

EG 166 Tut mir auf die schöne Pforte

1. Schließ mer uff des schöne Dierle,  
loss mich in dei Kerch jetzt nei.  
Dodrin duschd jetzt du regiere,  
alles Annre loss ich sei.  
Dann finn' ich mei Sunndachsruh  
unn mein Friede noch dezu.

2. Jesus, ich bin zu der kumme,  
jetzt kumm awwer ach zu mir.  
Als die Bibel hergenumme,  
dass ich was erfahr vun dir.  
Unn mit Bete unn mit Singe  
du ich dir mei Herz dann bringe.

3. Mach mich zu 'me guude Wingert,  
wu dir sieße Trauwe bringt.  
Zünd e Licht aa in meim Denke,  
des durch alles Dunkle dringt.  
Schließ mer uff die Ohre glei,  
loss mich jetzt dei Schäfel sei.

EG 449 Die güldne Sonne

1. Die goldich Morchesunn | so frehlich, hell un rund  
bringt unsre Grenze | mit ihrem Glänze  
ä herzerquickendes, liebliches Licht.  
Mein Kopp un mein Lääb | warn geleche im Bett;  
awwer jetzt schteh ich, | bin munder un frehlich,  
guck in de Himmel nuff | mit meim Gesicht.

2. Mei Aach dud schau, | was Gott dud baue  
zu seine Ehre | un um uns zu lehre,  
wie all sei Gschäfde sin | mächtig und groß  
und wo die Fromme dann | sollen hiekumme,  
wann se in Friede vum | Läwe hiegschiede  
aus dere Erd ihm ver- | -gängliche Schoß.

4. Owend un Morche | sin jo sei Sorche;  
sehne un mehre, | Uglick verwehre  
sin jo sei Werge un | Dade allä.  
Wammer uns leche, | dann isser zugeche;  
wammer uffsteiche, do | dud er uns zeiche  
all sei Barmherzichkeit | ganz wunderschä.

EG 157      Lass mich dein sein und bleiben

1. Loss mich dei sei unn bleiwe, ach du mein liewer Gott.  
Nix soll mich je vertreiwe vun deinem lewendich Wort.  
Herr, loss mich niemols schwanke,  
mach schtandfescht mich un treu.  
Dann will ich fröhlich danke un ewich bei der sei.

2. Jetzt geh mer widder weider uff unserm Lewenswech.  
Gottlob, mir gehen heider, durch Glick un a durch Pech.  
Mir wissen jo, du helpschd uns  
bei jedem Schritt un Tritt.  
Du zeigschd uns ach die Richtung, damit mir irren nit.

EG 251

1. Herz un Herz vereint beisamme suche mer in Gott jetzt Ruh'.  
Lossen eier Liewesflamme züngle uff de Heiland zu.  
Er de Kopp un mir die Glieder, er des Licht un mir de Glanz.  
Er de Mäschder, mir die Schieler, er g'hert uns un mir ihm  
ganz.

2. Kommen jetzt, ihr Gnadekinner, un erneiern eiern Bund,  
dun verschpreche eierm Herrgott Lieb aus diefschdem  
Herzensgrund.  
Un wann eier Lieweskedd mol widder ausenanner brecht,  
ei dann betteln um die Wett, dass unsern Jesus 's widder richt.

7. Loss uns, Jesus, so verschwore wie du mit 'em Vadder sei.  
Alles, was in d' Welt gebore worre isch soll äänich sei.  
Unn dann soll die ganz Welt sehe, dass du unser Herrgott  
bischt,  
weil vum Kopp bis zu de Zehe alle schtehen in deinem Licht.

EG 662      Schenk uns Weisheit, schenk uns Mut

1. Schenk uns Weisheit, schenk uns Mut  
fer die Ängschte, fer die Sorche,  
fer des Leweheit un morche:  
Schenk uns Weisheit, schenk uns Mut.

2. Schenk uns Weisheit, schenk uns Mut,  
fer die Wahrheit eizuschtehe  
un die Not um uns zu sehe.  
Schenk uns Weisheit, schenk uns Mut.

3. Schenk uns Weisheit, schenk uns Mut  
fer die Zeit, in der mir lewen,  
fer die Lieb, die wu mer gewwen.  
Schenk uns Weisheit, schenk uns Mut.

EG 644      Meine Zeit

Mei Lewens-Zeid | is uffgschriwwe in deine Händ.  
Ich kann jetzt ruhich sei, | ruhich sei in dir.  
Du gebeschd Geborcheheit, | Herr, zum Gude alles wend',  
geb mer e feschdes Herz, | machs doch feschd in dir!

1. Sorche quälen un wern mer als zu groß.  
Mutlos froch ich, was werd morche sei?  
Du hoschd mich lieb | unn du loschd mich nit los.  
Vadder, du werschd bei mer sei.

2. Druck un Hektik, Zeitnod un Betrieb,  
nemmen mich grad g'fange, jachen mich.  
heerschd mich rufe: Kumm un mach mich frei!  
Fiehr' un leit' mich Schritt fer Schritt.

3. Es gebt Dache, die bleiwen ohne Sinn.  
Hilflos merk ich, wie die Zeit vergeht.  
wie Schtunne, Daache, Johre gange sinn,  
froh ich mich: Grad wie vum Wind verweht!

EG 446 Wach auf, mein Herz, und singe

1. Wach uff, fang a zu singe  
mei Herz, dem, der all Dinge  
erschaffe hot un Sache,  
wu Mensche glücklich mache.

2. Heit Nacht henn dunkle Schadde  
in ihre Händ mich g'hadde,  
de Deifel wollt mich hole -  
Gott losst sich nit verkohle.

3. Er sacht zu mir: "Bleib liche,  
loss dich vun dem nit trieche,  
schlof weider, Kind, schlof weider,  
de Morche macht dich heider."

4. Dei Wort hot Recht behalde,  
so duschd du, mein Gott, walde.  
Die Sunn, die scheint ball widder  
noch jedem Schturmgewidder.

EG 293 Lobt Gott den Herrn ihr Heiden all

1. Lob unsern Herrgott, ach | du Heidevolk,  
lob 'en aus allerdienschdem Herze,  
Ihr liewe Leid nemmen de Mund mol voll  
dankt dem, der's Lewe dud gewähre,  
dass er aus seiner große Gnad uns all mitnand erwählet hot  
in Chrischdus seinem Sohne.

2. Sei iwvergroßi Lieb | un Herzlichkeit  
dud iwver u-u-uns schdets walde,  
sei Wahrheit, Gna-ad un Barmherzlichkeit  
die gilt de Junge un de Alde  
un währet bis in Ewichkeit, schenkt uns aus Gnad die Selichkeit,  
drum sing mit Halleluja.

EG 401 Liebe, die du mich zum Bilde

1. Liebe, du hoscht mich zum Bild vun  
deine Herrlichkeit gemacht.  
Liebe, du hoscht mich behüt un  
g'schützt in meine diefschde Nacht.  
Dir sing ich mei Loblied heit,  
dir g'her ich in Ewichkeit.

2. Liebe, du hoscht mich genumme  
wie ich bin, vun Aafang aa.  
Liebe, du bischt zu mer kumme  
in meim Jesus, wunderbar.  
Dir sing ich mei Loblied heit,  
dir g'her ich in Ewichkeit.

3. Liebe, was du hoscht erlidde  
in meim Name, dud mer Läd.  
Du hoscht fer mich Heil erschdridde  
un im Himmel lauder Fräd.  
Dir sing ich mei Loblied heit,  
dir g'her ich in Ewichkeit.

1. Herr Jesus, helli Sunn, du | wahrhaftdich Lewenslicht:  
mit Lewe, Licht un Wonne | wollscht du mei Aagesicht  
nooch deiner Gnad erfreie | un mein Geischt ach erneire,  
mein Gott, versach mer's nit.

6. Ach zünd dei Lieb doch ganz dief | in meiner Seel drin a,  
dass ich aus innerm Aatrieb | dich ewich lieue ka'  
un dodenoch ach sehe, | dass ich eifrich möcht gehe  
uff rechter Lewensbahn.

8. Darum, du Gott voll Gnade, | du Vadder, allmähdich,  
wend allen Seeleschade | un mach nei mich dächlich;  
geb, dass ich jo dein Wille | ach gedenk' zu erfülle,  
un schteh mer kräftlich bei.

Herr, ich setz uff dich, loss mich nit eigehe,  
sei gerecht und rett mich doch!

*Neich dei Ohre zu mer, helf mer schnell!  
Sei so stark wie en Felse im Pälzer Wald,  
sei so e feschedi Burch fer mich wie de Trifels,  
dass du mer helfscht!*

Denn du bischt mein Sandschtäfelse un mei Burch,  
un weche deinem Name  
duscht du mich leide un führe.

*Du willschd mich aus 'em Netz ziehe,  
des se mer stickum schtellen;  
weil: du bischt mei Kraft.*

In dei Händ iwvergeb ich mein Geischt;  
du hoscht mich erleest, mein Herrgott.

*Ich hass die Leit, wu sich halten an nichtiches Zeich;  
ich hoff lieber uff mein Herrgott.*

Ich frä mich un bin freehlich, dass du so gut bischt,  
dass du mei Elend agugscht un nemmscht mich a in de Not  
un iwvergebscht mich nit denne Deppe do draus;  
du schtellscht mich vum Kopp uff die Fieß.

Ich hoff als uff dich und saach: Du bischt mein Herrgott!  
Mei ganzi Lewens-Zeit schteht in deine Händ.

EG 177.2

Ehr sei em Vadder un em Sohn un em Heiliche Geischd,  
so wie's war am Aafang, jetzt un immerdar  
un vunn Ewichkeit zu Ewichkeit. Amen.

Gebet

Herr Jesus Chrischdus,  
du hoscht dich geweichert,  
als für dei Lewe annere hätten sterwe solle.  
Du hoscht Leide un Dod riskiert un dodurch mechlich  
gemacht, dass Mensche zum wahre Lewe finnen.  
Aus deim Dod is Lewe worre fer die Welt.  
Mer bitten dich heit:  
Vertrau uns dei Geheimnis aa,  
dass nur der 's Lewe find, der wu's hergebt.  
Zeich uns, wie mer Erfüllung un Lewensfrääd finne kenn.  
Amen.

Amos 5,21-24

So schpricht de Herr: Ich hab eier Feierdache satt, ich hab die  
Nas voll un kann eier Feschdelscher nimmi rieche.  
Un wann'er mer Brand- un Schpeisopfer opfern, dann  
hawwich ken Gfalle mehr dra un will eier fedde Dankopfer  
nimmi sehe.  
Du weg des Geplärr vun deine Lieder,  
ich will dei Harfeschpiel nimmi heere!  
Awwer 's Recht, des soll schprudle wie e Quell  
un die Gerechtigkeit wie en Bach, wu niemols ausdriggelt.

Markus 8,31-38

De Jesus hot aagfange sei Jünger zu lehre: "De Menschensohn  
muss viel leide un verworfe werre vun de Äldeschde und  
Hoheprieschter un Schriftgelehrte un umgebroscht werre un  
noch drei Daach ufferschdehe."

Un des hot de Jesus frei un offe zu ne gsaacht. Un de Petrus  
hotn beiseit genumme un wollt, dass er uffheert so zu redde.  
Awwer de Jesus hot die Jinger aageguckt un hot de Petrus  
weg gschtumpt und hot gsaacht: "Geh weg vummer, du  
Giftnickel! Du willscht mer nämlich nix vun Gott verzehe,  
sondern nur menschliches Zeigs."

Do hot er 's Volk gerufe un sei Jinger un hot ne gsaacht:  
"Wer mir noochfolche will, der muss sich selwer loslosse un sei  
Kreuz uff sich nemme un mir noochfolche. Weil, wer sei Lewe  
behalde will, der werds verliere; un wer weche mir unnem  
Evangelium sei Lewe verliert, der werds behalde.

Denn was ded des em Mensch helfe, wann er die ganz Welt  
gewinne ded un wär hinnerher krank an seine Seel?  
Was kann de Mensch iwverhaupt gewwe, fer sei Seel  
auszulöse?

Ich saach eich, wer sich fer mich schämmt, fer den werd sich  
de Menschensohn ach schäme, wann er kummt in de  
Herrlichkeit vum Vadder mit de heiliche Engel."

Markus 1,9-15

Domols hot sichs zugetraache, dass Jesus aus Nazareth in Galiläa kumme is unn hot sich vum Johannes im Jordan daafe losse.

Unn wie er do so ins Wasser gschdiche is, hot er gsehe, wie sich de Himmel iwerem uffdut unn de heiliche Geischd wie so e Täubsche zu'm runnergfloche is. Unn dann hot mer e Schdimm gheerd vum Himmel drowwe: Du bischd mein liewer Sohn, an dir haww ich mei Frääd.

Unn ball hot en de Geischd in die Wieschd nausgetriwwe;

Unn er war in dere Wieschd verzich Dach lang. Unn de Deifel wollten draakrieche. Unn er hot geleeht unner dem Viechzeich do draus unn die Engel hänn fer 'en gsorcht unn henn ,em gedient.

Wu se awwer de Johannes verhaft ghat henn, is de Jesus noch Galiläa kumme unn hot de Leid es Evangelium vunn Gott gepredicht

Unn hot gsaacht: Die Zeit is rum unn Gottes Reich is ball do. Gehen in eich, dun Buße und glaawen an des Evangelium.

Prediger Salomo 3,1-15

*Alles hot sei Zeit, unn alles Geduu unnerm Himmel hot sei Schtunn.*

*Gebore werre hot sei Zeit, schterwe hot sei Zeit;*

*Blanze hot sei Zeit, rausrobbe, was geblantz isch, hot sei Zeit.*

*Umbringe hot sei Zeit, heile hot sei Zeit;*

*Abbreche hot sei Zeit, baue hot sei Zeit.*

*Heile hot sei Zeit, lache hot sei Zeit,*

*jammre hot sei Zit, danze hot sei Zeit.*

*Schdäh fortschmeiße hot sei Zeit, Schdäh uffhewe hot sei Zeit;*

*Schmuse hot sei Zeit, uffheere se Schmuse hot sei Zeit;*

*Suuche hot sei Zeit, verliere hot sei Zeit;*

*B'halte hot sei Zeit, Fortschmeiße hot sei Zeit.*

*Verrobbe hot sei Zeit, flicke hot sei Zeit;*

*S'Maul halde hot sei Zeit, babble hot sei Zeit;*

*Liewe hot sei Zeit, hasse hot sei Zeit;*

*Dischbediere hot sei Zeit, Friede hot sei Zeit;*

*Kannschr der so viel Mieh gewwe wie'd willscht,*

*es bringt der jo doch nix. Du muschr jo doch durch.*

*Do is mer die Ärwet in de Sinn kumme, die wu Gott uns*

*Mensche gewwe hot, dass mer uns demit rumploochen.*

*Er hot alles soo schä gemacht unn hot uns ach e Ahnung vunn de Ewichkeit ins Herz gelecht.*

*Nur mir Mensche blicke nit durch, was de liewe Gott alles macht unn dut, weder Aafang noch End.*

*Do haw ich gemerkt, dass es nix Besseres debei gebt wie freehlich sei unn sich was Gudes du in seim Lewe.*

*Weil jeder Mensch, der wu esst un trinkt un is gut druff bei all seim Schdress, des is e Gottesgab.*

*Do haw ich gemerkt, dass alles, was Gott dut, fer die Ewichkeit is. Do kannschr nix dezudu unn nix weglosse. Des alles macht Gott, dass mer Reschbekt vor em hot.*

*Was bassiert, des is schunn lang bassiert unn was sei werd is ach schun längschr gewest. Unn Gott holt widder her, was längschr vergange is.*

Lukas 18,31-43

Jesus hot die Zwölf zu sich genumme un hot 'ne gsaacht: Mir gehn jetzt nuff noch Jerusalem, unn dort werd alles so bassiere mit em Menschenohn wie die Prophede es vorhergsaacht hänn. Er werd de Heide ausgeliffert, er werd ausgelacht, misshannelt unn aagschpuckt werre, sie wern en geißle un umbringe; unn am dritte Daach werd er ufferschtehe.

Die Jinger awwer hänn nix begriffe vun dere Redd. Sie hänn ääfach nit verschtanne, was dodemit gsaacht war.

Es hot sich awwer zugetraache, wu se in de Näh vun Jericho waren, dass do en Blinder am Wech gsesse war un gebettelt hot. Als der die viele Leit ghert hot, die vorbei gange sinn, hot er sich erkundicht, was do los is. Do hänn se'm gsaacht, dass de Jesus vun Nazareth grad vorbei kummt. Do hot er gerufe: Jesus, du Sohn Davids, erbarm dich! – Un die Leit hänn gsaacht, er soll nit so rumkreische.

Do hot er awwer noch viel lauter gschriie: Sohn Davids, erbarm dich!

Do is de Jesus schtehe gebliwwe un hot en zu sich bringe losse. Un wu er kumme is hot er'n gfroocht: Was willscht dann du, dass ich fer dich due soll?

Der Blinde hot gsaacht: Herr, dass ich sehe kann.

Un de Jesus hot zu em gsaacht: Vun jetzt aa kannschd sehe – dein Glaawe hot der g'holfe.

Un tatsächlich, do hot er sehe kenne un issen hinnerhergeloffe un hot Gott gelobt. Un alle, wu's gsehe hänn, hänn ach Gott gelobt.

1 Korinther 13,1-13

*Wann ich mit Mensche- un mit Engelszunge redde deet un hätt kä Lieb, dann wär ich wie wie so e Glock oder e klääni Klingel: Die bimmeln zwar schä, awwer kä Mensch verschdeht se. Un wann ich wie so en Prophet redde det, enner, der wu alles wääß, ach die diefschde Geheimnisse, wie enner, der die Weisheit mit Löffel gfresse hot un so fromm is, dass er, wie de Jesus gsaachd hot, Berche versetze kann. Wann ich awwer kä Lieb hätt, dann wär ich grad mol gar nix. Un wann ich mei Hab un Gud de Arme schenge det un mich selwer kaschdeie det, alles um unserm Herrgott zu gfalle – wann ich awwer kä Lieb debei hätt, dann det des alles iwwerhaupt nix bringe.*

*Die Lieb hot gude Nerve un gudi Laune. Die macht ken Druck, die iwertreibts nit, die bloost sich nit uff.*

*Sie isch nit uugezoche, sie bild sich nix uff sich ei.*

*Sie werd nit verdrieslich un sie isch nit noochdraachend.*

*Sie fräät sich nit an schlimme Sache, die bassieren.*

*Awwer sie fräät sich an de Woohret.*

*Die Lieb heert niemols uff, noch nit emool wann du mit deine Weisheit am End bischd un die Schprooch versaacht un de Verschtand aussetzt. – Weil unsern Verschtand is sowieso nur e Brovisorium un unser schlau Gebabbel ach. Un des heert alles uff, wann unsern Herrgott kummt.*

*Wu ich klää war, do haw ich gebabbelt wie e Kind un die Welt mit meine Aache gsehe. Jetzt, wu ich groß bin sieht des alles annershd aus.*

*So gehts uns heit: Mer sehen blooß so e verwischdes Schbichelbild. Awwer dann sehe mer vun Aagsicht zu Aagsicht. Jetzt verschteh ich nur Bahnhof – awwer dann kapier ich wie alles zammehängt un ach wie ich selwer eichentlich bin.*

*Un so bleiwen jetzt Glaawe, Hoffnung un Liewe. Awwer die Lieb is die greeschd vun denne drei.*

## Gebet

Ja, Friede, lieber Gott, den könnte mer guud  
gebrauche.

Dei ganzi Welt kännt Friede gebrauchte.

Es geht doch immer drunner unn driwwer  
unn mer wenn gar nimmi die Noochrichde gucke,  
weil alles so schlimm is.

Es helfft wirklich ball nix mä als nur des, dass mer wissen,  
dass du zu uns haldschd, dass mer uns uff dich verlosse  
kenn.

Unn so bete mer halt fer unser traurichi Welt, vor allem fer  
alle Kinner unn alde Leid. Liewer Gott, schdeh alle bei,  
die wu in Not unn Elend sinn.

Schick dei Engel, wann Nod am Mann is  
unn du die Uuschuldiche redde.

Alles schdehd in deine Händ. Do druff verlosse mer uns,  
im Name vun Jesus, deem Sohn, unserm Heiland. Amen.

## Kläänes Beischpiel

Original von Erich Fried (1921 - 1988)

Ach ugelehtes Lewe  
geht zu End  
nur halt langsamer meischdens  
wie so e Batterie  
in enre Daschelamp  
die wu kenner benutze dud  
un die bloos in de Schublad rumlichd.  
So uuneedich wie en Kropp.

Un dann, wann'd  
(saache mer mol)  
die Daschelamp  
noch so- un so viele Johre  
aaknipse willschd,  
dann kummt ken Forz Licht mehr raus  
un wan'd se uffmachscht  
findscht nur dei Knoche  
un wann'd Pech hoscht  
ach die  
schun ganz zerfresse

A her, - do hättschd wirklich ach leichde kenne!



### *Gebet und Vaterunser*

Guder Gott, himmlischer Vadder,  
schtärk unser Wissen do driwwer,  
dass mer des Beschde in unserm Lewe vun dir gschenkt  
kriechen. 'S wenichschde vun unserm Glick kenne mer selwer  
make.

Jesus Chrischtus, vor uns uff'm Wech.  
loss uns verschdehe, was mit Noochfolche gemäänt is.  
Helf uns, zu begreife, was uns so verdreht vorkummt.  
Schenk uns nur e bissl vunn deine Konsequenz,  
vunn deine Sorche um die Mensche,  
vunn deiner Selbschtvergesseheit und Selbschtgewissheit,  
vunn deem Gottverdraue.

Heilicher Geischt, du Kraft in de Wahrheit un in de  
Gemeinschaft,  
stärk unser wackliche Knie und mach fescht unser Schritte,  
schenk uns Z'sammehald, dass mer uns nit verirren.

Mer bitten dich fer Mensche, die wu allä sinn,  
dass se nit verkümmern, sondern uffbrechen.  
Mer bitten fer Verletzte un Kranke,  
dass se heil wern un Heil finnen.  
Mer denken an unser Verstorwene vun de vergangene Woch  
un bitten fer ihr Familie un fer ihr Freunde um Friede.

In de Schdille bringe mer vor dich, was uns noch beweecht: -  
STILLE -

Mitnanner bede mer, wie's uns de Jesus gelehrt hot un wie  
mers uff Hochdeitsch geweehnt sin: VATERUNSER